

四庫全書

經部

欽定四庫全書

經部

周官集傳卷一

詳校官監察御史<sub>臣</sub>徐如澍

刑部郎中<sub>臣</sub>許兆椿覆勘

謄錄監生<sub>臣</sub>任以依

欽定四庫全書

經部四

周官集傳

禮類一周禮之屬

提要

臣等謹按周官集傳十六卷元毛應龍撰張萱內閣書目稱應龍字介石豫章人大德間官澧州教授而江西志乘俱佚其名始末已不可詳考矣是書於諸家訓釋引據頗博而于鄭鑄之解義徐氏之音辨及歐陽謙之之說所採尤多

其自出已意者則題應龍曰以別之其中有  
沿襲誤說未考古義者如鐘師掌金奏以鐘  
鼓奏九夏壯子春鄭康成皆以九夏為樂曲  
而應龍獨引歐陽謙之說謂左傳襄四年曰  
金奏肆夏之三工歌文王之三文王而曰工  
歌是有詩而可歌者也肆夏而曰金奏是徒  
有其聲可以金奏而無詩可歌明矣今考孔  
穎達左傳疏云作樂先繫鐘故稱金奏此晉

人作樂先歌肆夏肆夏是作樂之初故于肆  
夏言金奏也次工歌文王樂已先作非復以  
金為始故言工歌也其說足與鄭注相發明  
如以九夏之文統金奏之下即以為非樂曲  
則鐘師又有凡射王奏騶虞諸侯奏貍首卿  
大夫奏采蘋士奏采芣之文貫于金奏下豈  
亦均非樂曲乎又喪祝禋牲禋馬亦如之鄭  
注禋讀如誅今侏太字也為牲祭求肥充為

馬祭求肥健也應龍亦主謙之說謂稠稠也  
禱牲稠盛也以康成改讀為非考稠侏二字  
古音本通非康成改讀楊雄國三老箴負乘  
覆鉢姦冠侏張晉書慕容垂載記符堅報書  
曰侏張幽顯魏書恩倖傳侏張不已北齊源  
彪傳吳賊侏張侏張即譎張侏與譎蓋猶侏  
與稠音同故義借安得指為康成改讀乎又  
臧氏為酺應龍引鄭鍔之說曰晏子謂六年

四升為鬴管子謂百升而成釜康成則謂四升曰豆四豆曰區四區曰釜為六斗四升以下文觀之其臂一寸而容一斗則當為斗釜之臂一寸而容一斗則釜之內方一尺而容十斗無可疑者十斗則百升正管仲所謂釜也康成謂四升曰豆每四而加故區至釜而六斗四升彼殊不考之于梓人也梓人為飲器爵一升觚三升獻以爵而酬以觚一獻而

三酬為一豆矣夫一獻則一升矣三酬則九升也以一合九非十升為豆而何而康成謂四升為豆失之矣今考康成謂鬴六斗四升實據經文方尺深尺以粟米法算之蓋粟米法方一尺深一尺六寸二分乃容一石鬴以鬴容一石則是鬴方尺深尺六寸二分矣其何以解于經文方尺深尺耶管子海王篇鹽百升而釜房元齡注謂鹽十二兩七銖一黍

十分之一為升當米六合四勺百升之鹽七十六觔十二兩十七銖二釐為釜當米六斗四升則是海王篇百升之釜乃寔百升之鹽非寔百升之粟也今鍔以管子量鹽之鬴為康氏量粟之鬴比擬已為不倫至于康成注梓人以豆為斗寔以豆止四升不及一獻三斛之數鬴誤以豆為飲器遂牽合十升之文反詆改豆為斗之非不知古以斗為飲不以

豆飲詩行葦篇毛傳曰大斗長三尺戰國策  
曰令工人作為金斗長其尾與代王飲即因  
反斗擊之此斗為飲器之証也越語曰觴酒  
豆肉韓子外儲篇曰取一豆肉是豆寔食器  
而非飲器之証也又安得引梓人之文為管  
子之旁証乎諸如此類皆未免膠執舊聞疎  
于考核至于冕服車旗之度廟祧昭穆之制  
司尊彝之六尊六彝司凡筵之五几五席方

功義弓之異名正歲正月之並用條例引証頗為明晰宋以來諸家散佚之說尚因是以存其厓畧則蒐輯之功固亦非尠矣其書諸家著錄皆云二十四卷今散見于永樂大典者地官夏官適當缺佚其餘四官首尾頗為完具謹錄為十六卷以一官三卷共得二十四卷計之仍其舊第也應龍所著別有周官或問五卷在集傳之外永樂大典割附集傳

之後其存者僅天官十九條春官十四條秋  
官冬官各一條篇幅寥寥不能別成一帙今仍  
附于各傳下既免以畸零散佚且使一家之  
說互相參証亦足以資發明焉乾隆四十六  
年七月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

周官集傳卷一

元 毛應龍 撰

天官冢宰第一

宰者主治之名天下萬事無一不出於天天有是事  
人有是官凡有職位皆所以代天治事冢宰總六官  
之事無所不統故稱天官李氏曰古人位曰天位工  
曰天工職曰天職自有深意

惟王建國辨方正位體國經野設官分職以為民極

惟專辭也首稱惟王示天下後世尊歸天子之義劉氏曰天子作民父母以為天下王謂命之王也國王者所都劉氏曰能使四方諸侯朝宗覲遇奔走以聽命者王者所以國也國中九里九經九緯之制即野中九夫為井之制一九夫為井之制即提封九百萬夫之地之制四海之內放之而準國有體而野有經須立官以治民使民得其中正設官謂設天地四時之六官分職謂分治教禮政刑事之六職極者至極

之義標準之名如北辰之為天極屋棟之為屋極常在屋之中央而四外望之以取正焉者此所謂民極即詩所謂立我烝民莫匪爾極洪範所謂汝極君牙所謂惟爾之中皆是也昔武王克商受命首訪九疇遷九鼎以定都洛之大計成王周公嗣守文武大訓作新大邑於東國洛卿貺土圭匠用水縣畫參日景夜考極星辨方正位法天道也體國經野順地道也設官分職以為民極立人道也此周公制作萬世不

能越自惟王以下至民極凡五句六官之首同此序  
文何同乎此也尊王也

乃立天官冢宰使帥其屬而掌邦治以佐王均邦國  
立者設其官使者授以職帥如子帥以正之帥邦王  
國也經中凡單言邦單言國者王國也連言邦國者  
諸侯國也王者之道有先後本末之序無遠近之私  
近者治而遠者不治非均也書曰無偏無黨王道蕩  
蕩無黨無偏王道平平無反無側王道正直所謂均

也上云掌邦治尊得以統卑下言均邦國外可以包  
內王國所先侯國所後掌主為本均平為末六卿分  
任天地四時之官十二小卿應十有二月三百六十  
官之屬上當三百六十五度周天之數下應三百六  
旬有六日成歲之功而皆統於天官冢宰鄭注云象  
天者蓋謂此也

治官之屬大宰卿一人小宰中大夫二人宰夫下大夫  
四人上士八人中士十有六人旅下士三十有二人府

六人史十有二人胥十有二人徒百有二十人

大宰者對小宰為文也如司徒以下各著大小二字於官名之上冢既訓大若稱大冢宰則文義複重又無緣以小宰為小冢宰宰者主治之名故止曰大宰小宰此經中變文之例餘各以尊卑為倍差 劉氏曰府掌治典之籍史掌治書之札王氏曰有藏則置府有書則置史有令之事則置徒有徒則置胥孟子所謂庶人之在官者

宮正上士二人中士四人下士八人府二人史四人胥  
四人徒四十人

宮伯中士二人下士四人府一人史二人胥二人徒二  
十人

陳氏曰小宰中大夫治王宮之政令先王之治自內  
以及外以及朝廷及邦國自宰夫以下即叙宮正宮  
伯二官掌諸官府之在王宮者掌宮中之徒役掌貴  
游子弟宿衛王宮者 宮伯為宮正之貳正猶帥正

之正伯猶伯仲之伯

膳夫上士二人中士四人下士八人府二人史四人胥十有二人徒百有二十人

庖人中士四人下士八人府二人史四人賈八人胥四人徒四十人

庖人膳夫之佐主辨名物故有賈八人辨名物者莫善於賈史之下次之以賈

內饗中士四人下士八人府二人史四人胥十人徒百

人

外饗中士四人下士八人府二人史四人胥十人徒百  
人

饗有內外而皆統於膳夫

亨人下士四人府一人史二人胥五人徒五十人

甸師下士二人府二人史二人胥三十人徒三百人

獸人中士四人下士八人府二人史四人胥四人徒四

十人

獻人中士二人下士四人府二人史四人胥三十人徒三百人

鼈人下士四人府二人史二人徒十有六人

春獻鼈蜃為互物之首故以名官

腊人下士四人府二人史二人徒二十人

腊從昔從肉言肉久而乾也

醫師上士二人下士四人府二人史二人徒二十人

醫能知五運六氣以飲食之屬養性養形却疾故在

飲食官之間

食醫中士二人

食醫掌調和飲食之齊當與膳夫為屬謂為醫也故

次醫師

疾醫中士八人

瘍醫下士八人

若今之外科醫

獸醫下士四人

酒正中士四人下士八人府二人史八人胥八人徒八十人

酒誥曰有正有事釋者曰正酒正也事羣吏之服其事者

酒人奄十人女酒三十人奚三百人

酒人之下疑有闕文奚賤者之稱唯其有宮中之役故有奄有女酒有奚下倣此 王氏曰奄者蓋民之有是疾先王因擇而用之與蘧篠蒙鏹戚施直縛聾瞶

司火瞽矇修磬同

應龍曰籛篠本疾名晉語曰籛篠不可使俯戚施不可使仰鰲鰲眉

也金之美者鑄鍾鱗也  
鍾上橫木木上金華

漿人奄五人女漿十有五人奚百有五十人

漿人六飲言入於酒府者以酒正當奉之故也

凌人下士二人府二人史二人胥八人徒八十人

籛人奄一人女籛十人奚二十人

女籛女奴曉共籛實之事者木豆為豆竹豆為籛瓦

豆為登籛宜乾物豆宜濡物 聶氏禮圖云案士虞

禮注云籩以竹為之有滕緣形制如豆亦受四升盛棗栗梅桃菱芡脯羞膾鮑粳餌之屬有巾 聶氏巾  
圖說籩巾用綌被纁裏紈一幅

醯人奄一人女醯二十人奚四十人

醢人奄二人女醢二十人奚四十人

鹽人奄二人女鹽二十人奚四十人

冪人奄一人女冪十人奚二十人

宮人中士四人下士八人府二人史四人胥八人徒八

十人

劉氏曰宮人掌其修潔者亦用士人焉應龍曰古者  
燧人王而始庖割軒轅帝而始棟宇故飲食居處之  
事雖並陳而先後有序

掌舍下士四人府二人史四人徒四十人  
幕人下士一人府二人史二人徒四十人  
掌次下士四人府四人史二人徒八十人

大府下大夫二人上士四人下士八人府四人史八人

賈十有六人胥八人徒八十人

賈善辨物及蓄藏之事

王府上士二人中士四人府二人史二人工八人賈八人胥四人徒四十有八人

賈知王者

內府中士二人府一人史二人徒十人

外府中士二人府一人史二人徒十人

司會中大夫二人下大夫四人上士八人中士十有六

人府四人史八人胥五人徒五十人

東萊呂氏曰自大府至外府掌府藏財賦自司會至職歲掌會計財賦故大府為府藏長以下大夫為之司會為會計官長以中大夫為之權勢足相檢括不得為姦利也歐陽謙之曰自大府至外府貨財之所在而主藏者也若宋監左藏庫官是矣自司會至職幣貨財數目多少之所在而主計者也若宋戶部是矣後世通謂之九府豈考之不詳而相襲以為說乎

司書上士二人中士四人府二人史四人徒八人

職內上士二人中士四人府四人史四人徒二十人  
職歲上士四人中士八人府四人史八人徒二十人

職歲主出歲者以歲斷

職幣上士二人中士四人府二人史四人賈四人胥二  
人徒二十人

古文幣與弊通謂事止功就而財有餘

司裘中士二人下士四人府二人史四人徒四十人

當是冬官裘氏之長

掌皮下士四人府二人史四人徒四十人

內宰下大夫二人上士四人中士八人府四人史八人胥八人徒八十人

王內官之長 陳君舉曰嘗讀闕雎知三代而上后妃極天下之選矣則宮掖之政一以聽之所為奚不可者今迺內小臣而下凡閹官九嬪而下凡婦官下至於女奴曉祝者曉書者曉裁縫者必屬之大臣則

夫員數之增損職掌之廢置祿秩之多寡賜予之疏數皆稟命於朝廷而后不與且使內宰得以稽其功緒而賞罰其勤惰苟違有司之禁雖天子不得自以為恩是故私謁不行而內政舉古之所謂正家者蓋如此而非屑屑然也今出房闥而方較是非於侵紊之後爭予奪於縱弛之餘抑末矣漢太尉楊秉糾中常侍而尚書詰以三公統外安得越奏近官益內治不聽於公卿大夫矣無恠乎後世之多亂也歟

內小臣奄上士四人史二人徒八人

稱上士者食其祿也曰內小臣者別夏官之小臣

閹人王宮每門四人圉游亦如之

刑人於守門則有之謂閹人則未詳以地官司徒守  
國門者下大夫二人又有上士中士下士之屬豈宮  
門嚴近而無官有司之職乃屬於刑人此於官名之  
下不見大夫士之官者當有闕文或是每門四人者  
為之長刑人者為之役也圉如王者靈囿之圉游游

幸之所

寺人王之正內五人

內豎倍寺人之數

九嬪

嬪賓從之義

世婦

鄭鍔曰名世婦者亦以廣嗣之路

女御

鄭鍔曰女御八十一人經亦不言數其義亦如世婦  
女祝四人奚八人

女史八人奚十有六人

毛氏詩註曰古有女史彤管之法 鄭鍔曰古者天  
子有史官左記言右記動故為天子者不敢有過舉  
王與后同體言動不謹則家道不齊無以舉天下之  
內治故有女史掌彤管之職

典婦功中士二人下士四人府二人史四人工四人賈

四人徒二十人

典絲下士二人府二人史二人賈四人徒十有二人  
典枲下士二人府二人史二人徒二十人

內司服奄一人女御二人奚八人

縫人奄二人女御八人女工八十人奚三十人  
染人下士二人府二人史二人徒二十人

追師下士二人府一人史二人工二人徒四人  
屨人下士二人府一人史一人工八人徒四人

夏采下士四人史一人徒四人

大宰之職掌建邦之六典以佐王治邦國

張氏曰周禮惟大宰之職難看蓋無許大心胷包羅  
記得此復忘彼其混混天下之事當如捕龍蛇搏虎  
豹用心力看方可 建立也謂立國以來之典故也  
在朝廷曰經謂常所秉執以理天下也在邦國官府  
曰法謂常所守以為法式也其目則治教禮政刑事  
總言其書曰六典按六典八法八則九賦九式九貢

九職大宰所掌大史所書司書所藏小宰司會有其  
貳他官各共所守不出乎六典之中佐者相左右也  
治者總教禮政刑事之法隨事施宜或損或益故為  
六官之首大宰之事于氏曰宰者濟其清濁和其剛  
柔而納之中和者此之謂也 呂氏曰周官三百六  
十綱目盡在六典宰相之職乃天下事之總統會要  
處也 陳氏曰六官各有典夏書曰政典蓋從來久  
矣傳有秩官九刑大司馬法之類皆周六典也藝文

志司馬法百五十五篇初劉歆以入兵家班固出之  
以為軍禮固之說是也今所存五篇 朱氏曰考工  
記即事典也 應龍曰禮典恐即是儀禮今儀禮相  
傳為周公作韓子曰儀禮行之於今者益寡然文王  
周公之法制粗在於是刑典如呂刑中所言是其槩  
也

一曰治典以經邦國以治官府以紀萬民

萬民侯國之萬民此三者治法之大節目有經則有

緯陳大猷曰經如今機織家先立絲以為之經有網則有紀司馬溫公曰若網之有網若絲之有紀應龍曰經邦國者九服蕃布於外經之使不易其常紀萬民者細民絲紛於下治之而不遺其小言紀則於經為詳也官府者王國之官府治之所從起也先言邦國次言官府明諸侯國亦各有官也天子曰兆民諸侯曰萬民舉外以包內也

二曰教典以安邦國以教官府以擾萬民

安者使安其分得其所教則授之以為治之意使之  
習熟於告戒然後施之事者無悖也擾如擾龍之擾  
馴伏其性而調順之

三曰禮典以和邦國以統百官以諧萬民

諧如八音克諧蓋八音清濁大小其音不同

四曰政典以平邦國以正百官以均萬民五曰刑典以  
詰邦國以刑百官以糾萬民

刑者聖人不得已而用之所以禁止其惡毆而之善

也糾割也察也刑百官如刑于四海之刑所謂士致百姓于刑之中也三山陳氏曰刑者特隄防之具爾鄭鐸曰萬民有過懼其積小以致大必糾其纖微無使藏姦匿惡以致於亂

六曰事典以富邦國以任百官以生萬民

事者度地居民興事造業民日用之生生不窮如十八卦聖人制器之類通變宜民衛文公務材訓農通商惠工馴致殷富又曰周官一書全只以典為本理

財雖以九式為要而九式亦不出乎六典之外

以八瀋治官府

典瀋則式其義皆相附近典包法則式之事法則式各得典之一義以者施用之名八瀋者官屬官職官聯官常官成官法官刑官計也治者舉辦會聽經正糾弊也官府見上注又按諸解以此八法之目即小宰所掌六屬八成之類名同而實非也小宰所掌乃此八瀋之貳

一曰官屬以舉邦治

屬者系屬如物相系屬則可舉舉者有所秉執而興起之也書曰各帥其屬凡建官則設屬以佐之以小傳大以卑隸尊脈絡貫通無不舉者

二曰官職以辨邦治

鄭鏐曰官雖設屬必有分職之法則邦治可辨蓋庖人雖不治庖尸祝不越尊俎而代之官各有職則責各有歸治不患其無辨也應龍曰職專事治如目辨

色

三曰官聯以會官治

大宰統百官均四海故有官聯以會官治聯者總衆異以為同會者合萬殊而為一自有衆賢肅和同寅協恭氣象

四曰官常以聽官治

歐陽謙之曰官常一官之常職任一官之事者守其一官之職待夫事之屬於本職者然後以其職而治

之此所謂以聽官治王氏曰八瀾惟官聯官常曰官治者以官之聯事官之常數特言一官爾故不言邦而言官也

五曰官成以經邦治

經者一定不易之名事至視已成之式以成其事物至視已成之式以成其物謂之成憲有司依據而行者也

六曰官瀾以正邦治七曰官刑以糾邦治八曰官計以

弊邦治

官刑即書所謂制官刑儆於有位糾者割制之使不為非察舉之使不敢慢

以八則治都鄙

法如衡之有權則如尺之有度三山鄭氏曰法有變有通欲得其平則立為定式使之取則應龍曰稍地

曰家邑

大夫之采

縣地曰小都

六卿之采

疆地曰大都

三公之采

家

邑以處大夫及王子弟之封邑視大夫者縣邑以處

卿及王子弟之封邑視卿者大都以封公及王子弟之封邑視公者家邑附內縣都附外此八則者治都鄙之法也故秋官有都則之職掌都家之八則春秋傳曰有先君之主曰都謂其始封之君也 鄭鍔曰都鄙之於王國譬之一家戶庭之於堂室也為父兄馭子弟之術不過立為準式使之取則王者之於都鄙殆亦然爾以其有先君之主故曰都以其在王畿之鄙故曰鄙其地不出王畿之外非如邦國諸侯得

以自治其國故王朝立施設之則使之事事取則於此焉

一曰祭祀以馭其神

祭祀者其先君社稷五祀所食也大宗伯頒祀於邦國都家鄉邑都宗人掌都祭祀之禮此有其則不可以僭瀆不可以怠廢馭者馴而納之於善謂調習之使各由其所當行之路而不出於法度之中也歐陽謙之曰馭蓋制馭之意所謂馭其神非所以施之於

神所以制馭夫都鄙之君所以事神之道

二曰濫則以馭其官

歐陽謙之曰有都鄙之主則有官屬其屬有其長得  
自除者有必待朝廷除者兼品秩祿廩之厚薄員數  
之多寡皆須為之定法乃馭其所以處官職之道也

三曰廢置以馭其吏

或因事而建置事畢省廢皆不使至於冗濫故謂之  
馭吏羣吏也庶人之在官者 歐陽氏曰都鄙之長

雖曰畿內諸侯然猶王所自治如都宗人都司馬家司馬朝大夫都則都士家則家士皆王國自命之是其可不同夫內之官府察其人而廢置之其權可不  
在王國乎

四曰祿位以馭其士

祿田祿位朝位 歐陽謙之曰學士即卿大夫之子卿大夫即都鄙之長取其子弟之有賢能精學業者而擢用之此成周教胄子之本意也或問八則祿位

以馭其士鄭司農注士學士也其說似拘如何曰士以祿位言固難一槩論按夏官司士之職掌羣臣之版賈氏謂羣臣者畿內朝廷及鄉遂都鄙諸臣故陳氏云凡以道藝仕於國者不以貴賤總謂之士始附於版者士也故曰司士又按官伯掌王宮之士庶子凡在版者此所謂士乃公卿大夫元士之適子庶子王氏曰庶子國子之未仕者愚謂以士對庶則士為己命者也此經馭其士者都鄙之士也上文既曰馭

其官馭其吏此又曰馭其士信乎為都鄙言之則士者公卿大夫之子而已

五曰賦貢以馭其用

九賦斂財之則九貢制用之則都鄙以十一之法賦於民以四之一參之一之制貢於王而後得用其餘而其用度亦又有則歐陽謙之曰賦即邦縣邦都家削之賦是也貢即閭師貢其物之類是也都鄙之地食其公田之入即所謂賦然豈無山林川澤可以

稅取者乎是所謂貢周人之法征其米粟征其布縷  
征其力役惟關市有泉布及無職者出夫布宅不毛  
者有里布外此未嘗取民以錢也孟子亦謂有布縷  
之征力役之征而已而鄭氏解九賦專引漢法以為  
口率出泉不知所考而云夫泉布者官所自鑄非民  
之所有也周人制賦惟以民之所有不責其所無若  
角人齒角之物羽人羽翮之政掌葛絺綌之材者皆  
使之以當邦賦是可見也至關市有泉以交易則或

征之其宅不毛與凡田不耕與無職事者稍征其布以困苦之而使無舍本趨末而已非征賦之本意也詎可以後世之橫取而誣先王之仁政哉

六曰禮俗以馭其民

節文必因乎人情好尚不違乎禮制

七曰刑賞以馭其威

鄭鐸曰當刑而刑當賞而賞必循吾賞罰之則應龍曰刑賞忠厚之至洪範曰惟辟作威蓋此都家之獄

必上於國所以制為所得用之刑賞而有其則爾

八曰田役以馭其衆

田畝狩之總名役師徒之總名散而居曰民合而興  
曰衆古者諸侯田不過三祭祀賓客充君之庖役不  
過三凡一夫歲用其力三日上農夫食九人可用者  
家三人所以立為之限制使循吾田役之則也鄭鏐  
曰田役合民而用之故曰衆馭其衆則彼不敢非時  
而用衆

以八柄詔王馭羣臣

大宰八柄大臣之事與內史八枋有司之事不同大臣之事有揆度有司之事奉法而已 鄭氏曰柄所

秉執者王氏曰言操此以為用也應龍曰馭者馭而納之於善羣臣受命於上有職位者大宰之職如六典八灋八則之屬凡不言詔王者皆佐王所施行之事如八柄八統之屬凡言詔王者皆冢宰常行之事但以其目詔告于王也周官有官府有羣臣有羣吏

皆謂之臣官府則備一官為卿百官有司統焉羣臣則命士以上者之稱羣吏掌於小宰乃庶人之在官者府史胥徒之屬

一曰爵以馭其貴

一命以上不與凡民齒貴也鄭鍔曰以爵為貴其柄在我乃所以馭之也

二曰祿以馭其富

有爵則有田賦吏民所以賦也鄭鍔曰以祿為富其

柄在我乃所以馭之也

三曰予以馭其幸

鄭氏曰予者賜予也鄭鏐曰幸者人臣一時之遇也

四曰置以馭其行

置者特有所建立之名行謂德之可見於行事者也

五曰生以馭其福

王制弗故生也亦此義

六曰奪以馭其貧七曰廢以馭其罪八曰誅以馭其過

奪者絀爵削地收其田里之名此祿以馭其富之反也

以八統詔王馭萬民

統猶綱也舉於上而下自從焉

一曰親親二曰敬故

親謂父母兄弟宗族故謂舊老成人親親仁也敬故義也親敬二字便是詔告於王以統馭萬民之體要處論語曰君子篤於親則民興於仁故舊不遺則民

不偷

三曰進賢四曰使能

進者推舉而登進之使者稱其能而任之賢者能者凡民平日所景慕而從之者也

五曰保庸六曰尊貴

以其嘗有功於民能保民者故保安之尊貴者天下有達尊三爵一是也此二者民之望也

七曰達吏八曰禮賓

達先之也吏有司也語曰先有司吏者承流宣化道  
民情者也書曰臣為上為德為下為民賓異於常人  
者以禮禮賓之如先代之後及故舊先哲祀宋與箕  
子商容之屬考大宰職首至以富得民又當分兩  
節看六典八法八則八柄八統是掌邦治之事為一  
節九職九賦九式九貢九兩是制國用之事為一節  
上一節六典為要其緊處在八統下一節九式為要  
其緊處在九兩八統九兩皆歸宿於民民者邦本

以九職任萬民

萬民諸侯國之萬民舉外以見內陳君舉曰天之生民未有無能而養者能其事而後可以養無事而食衆之殃也故聖人制天下之民各從其能以服於事大宰既任之職閭師又責其功故曰無職事者出夫布也王制瘠鬴跛躄斷者侏儒百工各以其器食之後之游民作無益以害有益者可勝計哉正義曰器能也因其各有所能供官役使以廩餼食之如晉文

公問八疾胥臣對云侏儒扶廬聾瞶司火之類各以器食之扶廬持戟柄也司火主然火也

一曰三農生九穀

九穀黍稷稻粱麻大豆麥苽也周以農事開國故八政以食為首九職以農穀為先三農亦曰上中下三等之農

二曰園圃毓草木

毓養也載師以場圃任園地因園圃之民而用之以

養毓之職則草木得遂其性矣草葵瓜之屬木桑棗之屬

三曰虞衡作山澤之材

山虞掌山林之政令川衡掌巡川澤之禁令山林川澤之職有聯事也作者作興凡國家用度需材山澤之產為多虞衡掌其政令識其可用之材作而興之如仲夏斬陽木仲冬斬陰木以至蒯紵管葛染草之屬無棄物也

四曰數牧養蕃鳥獸

凡魚鴈狼鹿之屬生數麓之間牛羊六畜之物在牧養之數數則大數小數虞人任其事牧則收入及養鳥獸之官任其職 鄭鍔曰數牧之民而任以養蕃之職則鳥獸不可勝用矣

五曰百工飭化八材六曰商賈阜通貨賄

工者審曲面勢飭財辨器之職飭者致力以治之化者因形移易以成之八材金木羽革骨角玉石如飭

金則化為鍾斧之屬爾雅曰珠曰切象曰磋玉曰琢  
石曰磨木曰刻金曰鏤草曰剝羽曰析今本珠作骨  
七曰嬪婦化治絲枲

鄭鏐曰嬪有夫者之稱書曰嬪于虞虞舜夫也婦有  
姑者之稱春秋書伯姬來逆婦伯姬姑也 應龍曰  
枲麻屬治絲而化之以為帛治枲而化之以為布

八曰臣妾聚斂䟽材

聚者收之於此斂者取之於彼䟽麓也䟽材未飭治

之材

鄭鏐曰疏百草根實可食者材薪芻之可委積者此說雖本注疏之言此不取

九曰閒民無常職轉移職事

閒民閒隙之民任已職之外有餘閒可以執他人之事所謂通功易事以羨補不足者或問九職任萬民劉說亦善劉氏曰九職者任天下之民以九事也頒其職之事則大司徒主之任其民而徵其賦貢則閭師掌之太宰之所掌者域萬民用九職以為業則普天之下率土之濱無異業之民所以均四海統萬

民故無左道以惑衆者無游手以失職者無夷風以  
亂華者莫不係於鄉閭由於禮義而用中於五品者  
焉是故無遺一民毋棄一物無缺一用於天下以九  
職域其民故也秦漢以降其民不入于九職者多矣  
求建其極不亦勞乎

以九賦斂財賄一曰邦中之賦

賦者自上取下之名其別有九財賄與貨賄同

二曰四郊之賦

按四郊去國四面各百里

三曰邦甸之賦

按四丘為甸出車一乘

四曰家削之賦

王昭禹曰家削家邑稍地

五曰邦縣之賦

邦縣五鄙為縣

六曰邦都之賦

邦都四縣為都方五百里

七曰關市之賦

關市市必有關見司關之賦

八曰山澤之賦

名山大澤不以封山師川師掌其政令

九曰幣餘之賦

歐陽謙之曰凡財之入於官者皆謂之賦而官貨財物之出入其籍各異其出而為用也既載於出財之

籍矣則用餘而復入於官也豈可不又載之入財之籍乎既載之入財之籍安得不謂之賦哉 徐筠曰此載師任地所征之賦也鄭氏曰賦者口率出泉後之筭民錢或謂之賦又曰幣餘謂占賣國中之斥幣二說皆非經義豈有九賦而出錢者以九式均節財用

均平也節為之防範使無過不及之差九式有一定之常目為不易之經制以之均財為有道以之節用

為有禮無有餘之浩不足之暴無豐年之奢凶年之  
儉當時皆別其書鄭鍔曰節其一而不節其二節於  
此而不節於彼非均節也凡事各有式以為之節是  
之謂均所謂式者為之書以記其多寡也

一曰祭祀之式

鄭鍔曰祭祀有天神人鬼地示之殊應龍曰祭先血  
腥祀尚氣臭其大小有制豐殺有數

二曰賓客之式

賓客先代之後朝聘之禮有親遠新舊

三曰喪荒之式

以凶禮哀邦國之憂有輕重緩急鄭鍔曰喪有賻贈視其爵等之高下荒有賑救視其災勢之輕重

四曰羞服之式

羞飲食也服衣服也有尊卑貴賤曲禮曰庶羞不踰牲燕衣不踰祭服

五曰工事之式

器物必中度量有精麤廣狹如考工所記是也

六曰幣帛之式

式謂有名物數制

七曰芻秣之式

草曰芻穀曰秣有勞逸遠邇

八曰匪頒之式

王所分賜羣臣之禮如分寶玉頒祀頒禽歸脰之類  
有親有賢

九曰好用之式

好與為好也王府曰好賜此如燕勞羣臣兄弟朋友  
賜王賜器之類有功有故鄭鍔曰燕好所用者雖至  
尊用財不可以有司之法拘之亦不可過制焉

以九貢致邦國之用

貢者下奉上之名庶民有田則有賦諸侯有國則有  
貢貢亦出於賦故致者至也使之自致而已不可以  
徵而求也周官制為九貢之法令五等侯國各守常

職以貢其所有以為王國之用度其不在九貢之法者上弗受也下弗進也歐陽氏曰致邦國之用乃朝廷所須以為用而出於邦國者則不致其無用之物可知矣

一曰祀貢二曰嬪貢

鄭鏐曰祀貢祭祀所貢凡可以交神明之物

三曰器貢四曰幣貢

鏐鏤石磬丹漆之屬凡可以為用器兵器禮樂器之

物

五曰材貢

鄭氏曰材貢櫨榦栝柏篠蕩也應龍曰按集韻栝亦作櫨夏書栝榦栝柏

六曰貨貢

鄭鍔曰貨如金玉龜貝之類

七曰服貢

絺紵玄纁纁纁織皮之類凡可為服之物

八曰旂貢

旂者鄭司農以為毛羽謂旌旗之末為旂也康成以  
為燕好珠璣琅玕之屬謂園游之為旂也或曰司常  
旂車載旌以田之鄙以旂為田獵巡幸之名如所謂  
取於相土之東都以待王之東蒐者之類也應龍謂  
此當闕疑

九曰物貢

如山澤各以其物貢是也

以九兩繫邦國之民

周官九兩之法使兩兩相繫有彼不可無此雖天下之廣萬民之衆體勢聯屬若系無間然也

一曰牧以地得民

牧者牧民之官王制建五等諸侯五國以為屬屬有長十國以為連連有帥三十國以為卒卒有正二百一十國以為州州有牧各有分地故曰以地得民鄭鍔曰五等諸侯皆有地獨言牧何也蓋牧者諸侯之

長諸侯雖有其地苟非八命之牧修方伯連帥之職使之大小相維亦無以保其地何以得民哉

二曰長以貴得民

以官府則有長大事從之尊朝廷莫如尚爵尚爵者古今天下之達道也故曰以貴得民

三曰師以賢得民

師者民之模範也有德行賢于民民從而師之通貴賤以至四民九職必皆有師服勤至死為其賢也

四曰儒以道得民

儒通天地人之稱有行誼能傳道解惑引民由是而之者 師與儒二者在朝廷則有師氏保氏之官在閭里則有左右閭師之職 鄭鏐曰古之致仕而歸於鄉里者謂之師儒

五曰宗以族得民

宗宗子也

六曰主以利得民

利者其都邑之民利賴之也泉府曰都鄙之民從其主國人郊人從其有司又大夫之家亦稱主歐陽氏曰民大夫之臣隸也大夫之家臣呼其大夫曰主左傳曰事吳敢不如事主

七曰吏以治得民

吏治其賦者國人郊人從其有司是也

八曰友以任得民

鄭氏曰友謂同井相友助者鄭鍔曰急難之際能相

保任則民不忍棄之

九曰藪以富得民

澤無水曰藪有大小中小三等虞人掌之鄭鍔曰澤中  
水去草生包藏孕育者多民欲其富而不去應龍曰  
先王之制於藪有虞掌其政令為之厲禁則其間所  
生之物充牣繁庶而民足以致富利重而難遷惟土  
物愛厥心臧也王次點曰財散則民聚故牧長主吏  
師儒宗友之後以藪富終焉善治者當務識其大體

應龍曰九兩大意與八統相似上一節論治體不以八統馭之則徒法不足以固民心下一節論財用不以九兩繫之則務財不足以得民聚

正月之吉始和布治於邦國都鄙

始和讀連下句正月者以是月為十二月之長和如四方民大和會百工播民和周書常用此和字周禮以歲終令百官府各正其治受其會聽其致事至王正元會大宰以是日為始和布治法於天下夫治法

之在邦國都鄙固有一定而不可易者然古人平在  
朔易革故從新其事實繁方一歲之首豈無所當改  
易害則除之利則興之民之所既倦則不以困民  
之所未安則不以強民將與時偕行新新而無窮也  
按周以建子為正此是正月元會所行在唐虞三代  
雖未見元會之文而考之載籍自有正月上日之文  
以來莫不從用此日可推而見

乃縣治象之灋于象魏使萬民觀治象挾日而敘之

乃者承上文起下義此正歲建寅之月也縣垂也治象前所布治之象也又從而畫象其事以明其法也象闕雉門外東西兩闕也象者謂祖宗以來垂象於此也魏者當道高巍巍然也挾日從甲至甲十日一周浹也考周官之法並以建子之月謂之正月以正時王受命之紀而以建寅之月為正歲以正天運四時之序凡計月之一二必以正歲為一月也大宰掌邦治既於正月建子之月以其典籍布之邦國都鄙

藏官府有司守之以時奉行矣又於孟春寅月四時之首萬民畢出之時以前所布之治法畫象其事垂之雙闕之下使臣民皆得觀見其法之形象縣之高則無不見斂之速則無玩詩曰周道如砥其直如矢君子所履小人所視謂其均平洞達無不備也正歲見下小宰文或問鄭氏以正月為周正之月正歲為夏正之月是一年有兩正月而集傳各從其說何也曰周雖改正朔而未嘗改時月周以建子為正

凡大朝會大建立行之於建子之正所謂時王之正也然春夏秋冬乃天運四時之正凡十二個月從古至今未嘗易考之書前乎周者以建丑為正其書始即位惟元祀十有二月乙丑以見月未嘗易考之史後乎周者以建亥為正其書始建國曰元年冬十月以見時未嘗易故周禮經文有正月又有正歲互見於大宰小宰蓋小宰所以佐大宰者也大宰布治法於建子之月所以明一代時王元會之正故謂之正

月小宰帥屬觀治象於建寅之月所以明一歲天運  
時序之正故謂之正歲今以周之時月考之七月周  
公陳於成王之詩也曰七月流火九月授衣則成王時  
月未嘗改也六月宣王詩也而釋者曰盛夏出兵則  
宣王時月未嘗改也四月幽王詩也而曰四月維夏  
六月徂暑則幽王時月亦未嘗改也朱子曰所謂改  
正朔者以是月為歲首耳月固不易也蓋改正朔為  
歲首者時王之正而月固不易者歲有四時所謂十

二月之序則不可紊也故嘗謂自堯典定時成歲之後不特三代無改時易月之事如四時十二月之序乃百世不能改者惟改正朔繫於時王之典各用所改之正以為正初不嫌於謂正月或者執朱子不改月之說遂疑鄭氏解周禮正月之吉為周正月則是改十一月為正月而建寅又為正月是一歲有兩正月不思朱子固嘗曰三代之正不同夏用人正商用地正周用天正以此推之商用地正則十二月商之

正月也周用人正則十一月周之正月也既曰正矣何嫌於以十一月十二月為正月乎至于一歲兩正月之疑以周禮考之經文所以特謂之正歲此固可見按史唐武后天授元年十一月朔日南至改用周正以十一月為正月十二月為臘月夏正月為一月武后是時改唐為周取法周正則在周十一月不嫌於稱正月而十二月為臘月夏正月為一月凡此者安知武后非據周而改作乎况周禮正月大宰布治

法於邦國都鄙至正歲而後小宰率屬觀治象而徇以木鐸以先後次序考之正月正歲之分固已可見兼經文尤有明白可信者如鄉大夫職云正月之吉受教法於司徒下文云歲終則令六鄉之吏會政致事正歲令羣吏攷法於司徒以退各憲之於其所治又州長職云正月之吉各屬其州之民而讀法下文云歲終則會其州之政令正歲則讀教法如初故嘗謂世儒泥執一偏之見率以大宰正月始和為夏正

月其意豈非謂正歲之文見於小宰而大宰乃縣治  
象之法本文原不曾有正歲二字因以鄭注為非却  
不知地官鄉大夫州長二經皆於上文云正月之吉  
於下文歲終之下又云正歲如此觀之經文三節極  
為明白要知正月即周正之月以十一月為歲首也  
歲終即豳詩曰惟改歲之月以十二月為歲終也既歲  
終矣又云正歲則是以夏正建寅為得一歲四時之  
正凡周人歲首之事又於此時重申之故觀鄉大夫

職云正歲憲之於其所治之國則大宰乃縣治象之法其在正歲為可知也觀州長職云正歲讀教法如初則所謂如初者即是如正月始和之初為可知也不然經文上下同此一職既曰正月又曰正歲既言受法於司徒又言考法於司徒既云屬其民讀法又云讀法如初此豈同一時之事哉後世儒者於周禮正月例以夏正為拘者但參以經文則是是非非不辨而明矣或問周禮正月之吉與春秋王正月同乎

曰正月者周正之月二書所稱其義固同也嘗考春秋書元年春三字是一截書王正月三字又是一截左氏傳曰元年春王周正月此說最為明白不可例以傳不可信非之程子曰周正月非春也只此一言已足以祛千載之惑故觀程子之說有所謂周正月則知周禮經文稱正月之吉是周之正月無疑嘗觀胡文定公謂春秋以夏時冠周月其意蓋謂冬不可以為春而誤認程子假天時以立義之說遂謂春秋

行夏時以繫年故以春之一字冠於周正月之上則是春者夏時之春也不思周以十一月為正而未嘗以十一月為春若以夏時之春為周正之月則似以冬為春此決不然蓋周自東遷以後魯用魯歷國自為政時亦寢紊以聖經書法攷之則以十一月為春者魯之元年也何以言之魯隱公即位之歲則周平王四十有九年也在春秋書法當云王四十有九年正月而書曰元年春王正月以元年春繫之隱公以

正月繫之王其義昭然可見聖人之意若曰元年者魯自改元之元年非王之元年春者魯自以為春非王之春故曰元年春獨正月則王之正月爾故曰王正月要知聖人因魯史修春秋書隱公元年春者乃因魯史之舊文而寓王之一字於元年春之下者乃出夫子之特筆此說信為顛撲不破近世儒者以建寅之月為氣候始溫和遂以周禮註疏釋正月建子為非徒執泛泛一偏之說而未嘗合前後經文參攷

而紬繹之故嘗為之說曰商以建丑為正周以建子為正而皆用夏時數月則以十一月十二月為正未嘗改月者固也然未知春秋書王正月則以尊時王之正朔周禮云正月之吉則以出歲首之政令二者皆建子之月此不易之論也或又問前說始即位書元祀十有二月始建國書元年冬十月以證歷代改正不改月是矣獨周公作六典夫子作春秋乃以周十一月改書正月何也曰元祀十二月元年冬十月

史官書法之當然也史以年繫月固不可易月以素  
四時十二月之序若周公制禮于每歲舉行元會之  
儀授時飭典以建子為十二月之長故大宰於是月  
布治所以昭時王之正則不得不稱正月至夏正建  
寅之月乃四時之首為一歲之正則不得不改稱正  
歲小宰於是月帥屬觀象徇以木鐸此正有合於夏  
書孟春木鐸徇於路之事夏書徇鐸下文所舉政典  
先儒謂政典乃六典之一周之六典蓋因於夏則周

禮正歲徇鐸宣令實遵夏之舊典攷之是月在夏曰  
正月在周曰正歲其為孟春則一也至若春秋所書  
王正月寓王之一字於元年春之下聖經所以著魯  
公無王之罪其義昭然 或問周公於周禮改建子  
之月為正月而以正歲表建寅之月然凌人又云正  
歲十有二月何耶曰於此見周用夏正數月而先儒  
月未嘗改之言信矣正歲者謂夏之建寅為正十有  
二月建丑乃冰堅腹厚之時按豳七月詩云二之日

鑿氷沖沖朱子詩傳謂周禮正歲十二月令斬氷是也攷之凌人正歲經文故書正為政鄭司農云凌人掌氷政主藏氷之政也於義亦通然以經文上下推之若以凌人掌氷政為句絕而下句以歲十有二月為文則不見周雖改正建子而用夏正數月乃歷代不易之制故杜子春謂政當為正以正歲向下為義是以註疏皆不能易其說也

乃施典于邦國而建其牧立其監設其參傳其伍陳其

殷置其輔

乃亦更端之辭也典六典也牧牧民之官監監守也  
王制天子使大夫監於方伯之國國三人梓材王啓  
監厥亂為民呂氏曰黃帝立左右監監視萬國建者  
始初開創之名立者繼有植立之義合三人之益曰  
參叶五人之助曰伍傳者上下相附著也殷衆也謂  
衆士也陳則旅衆一體置則可自署置王制大國三  
卿五大夫或問正月始和每歲布治縣象以示更

新而所謂牧監以至殷輔亦皆每歲建立設傳陳置之何若是之紛更與曰先王之時其修明法度督責臣下最為周密故凡正月布治縣象於典則法之不宜者既有以變而新之矣經下文又曰乃施之于邦國都鄙官府此非他有所施也正所以督責夫推行於天下之人蓋謂布于此者欲其施于彼若夫玩法而不治之人大宰已得於歲終受百官致事之時至是豈可恬視而不為之變置故不得不繼之以建立

設置之事也大宰於歲終詔廢置彼自牧長至於殷  
輔凡不在所廢者則皆在所建立設傳陳置矣牧非  
世牧也九牧之牧取諸侯之有功德者為之非若有  
國之諸侯得以世其國者監則監諸侯之國者其祿  
視諸侯之卿其爵視次國之君其祿取之於方伯之  
地凡此皆有升黜改易待正月而舉行之大宰歲終  
與公卿共飭國典以待來歲之宜者此皆其事也

乃施則于都鄙而建其長立其兩設其伍陳其殷置其

輔

長都鄙之長兼二人之力曰兩

乃施灋于官府而建其正立其貳設其攷陳其殷置其  
輔

凡為各官之長皆正也凡為各官之倅貳者皆貳也  
攷稽也如今官府必有稽攷炤點磨勘之職或曰宰  
夫鄉師肆師之屬凡任稽攷之職者皆謂之攷餘同  
上又按此以上三條曰施典施則施法是布治之大

綱曰邦國都鄙官府是施行之次序曰建牧建長建正之屬是分職之大概鄭鍔曰上言布治謂治道隨時之宜每歲有更革所以通其變此又云施典施法施則者邦國都鄙官府所守一定之制久而不易者也

凡治以典待邦國之治以則待都鄙之治以灋待官府之治以官成待萬民之治以禮待賓客之治

凡者其目不一發凡於此歲首布治施之於彼者歲

終受會以待之於此典必合於典則必合於則法必  
合於法也官成在八法禮在六典民則邦國都鄙皆  
有民而有間田公邑之民王者使吏治之者不在典  
則之中而在官成之法賓客者先代之後王以賓禮  
接之雖其治法同在邦國之典而待之之禮則異於  
諸侯羣臣故二者別出之 又按周官職文益載未  
盡者皆於後稱凡以總之諸稱凡之例始此

祀五帝則掌百官之誓戒與其具脩

五帝五方之帝春官兆五帝於四郊是也大昊炎帝  
黃帝少昊顓頊食焉誓戒其所當戒者具者牲牷器  
皿之屬脩者飭治掃除之類掌者掌其法而其事則  
有司者治之秋官條狼氏之職凡誓執鞭以趨於前  
且命之誓僕右曰殺誓馭曰車轅誓大夫曰敢不闕  
鞭五百誓師曰鞭三百誓大史曰殺誓小史曰墨  
前期十日帥執事而卜曰遂戒

此文誓戒目

金匱要略卷一  
及執事眡滌濯及納亨贊王牲事

贊助也亨熟之也及納牲受亨之時贊迎牽殺獻之事毛血爛腥熟之等

及祀之日贊玉幣爵之事

自眡滌濯已下至此所謂具備也

祀大神亦如之享先王亦如之贊玉几玉爵

玉几所以依神天子左右玉几宗廟獻用玉爵特言

玉几玉爵者天地五帝不用不用者何無飾也無褻

也

大朝覲會同贊玉幣玉獻玉几玉爵大喪贊贈玉含玉  
會無常期謂若諸侯有不順服者其順服之國皆以  
師來助王討之而曰會也同者謂如王即位始建諸  
侯及王十二年不巡守則諸侯皆來朝而曰同也

鄭氏曰贊助也玉幣諸侯享幣也

玉者圭璋璧琮琥璜幣者馬皮帛錦

繡

玉獻諸侯獻國珍異亦執玉以致之

如來獻其琛之類是也

玉几立而設几優尊者也

凡大朝覲王位設黼座前南鄉莞筵繅席次席設左

右王 王爵禮諸侯之酢爵王朝諸侯禮之於阼階上

几 謂上公再裸而酢侯伯一 應龍按朝覲會同之禮其

裸而酢助王所受之爵也 事則大宗伯相之其細者司儀大小行人等掌之大

宰惟助王受此四者而曰大朝覲會同此非常之禮

也 朱氏曰覲是正君臣之禮較嚴天子當依而立

不下堂而見諸侯朝是講賓主之儀天子當宁而立

在路寢門之外相與揖遜而入

作大事則戒于百官贊王命

國有大事若軍旅之事之類戒飭百官有司則助王為教令若書曰周公以王命誥鄭鐸曰作者創始而為之贊則助之以言叙述王意以啓迪之也

王眡治朝則贊聽治眡四方之聽朝亦如之

聽聽斷也四方之朝王出巡狩諸侯於方岳之下及六師在外亦有視朝聽斷之事

凡邦之小治則冢宰聽之待四方賓客之小治

凡者其事不一總括不盡故言凡以該之例始於此

六典言佐王八柄八統言詔王此治之大者非大宰  
之所得聽也惟邦之小治冢宰得以專決四方賓客  
之來其治之小者亦得以自待之 鄭鑄曰治之大  
者不稟于王則嫌於專朝廷之權治之小者不聽於  
冢宰則無以重大臣之權姚崇為相常於帝前敘進  
郎吏帝以為我任崇以政大事吾當與決至用郎吏  
崇顧不能重煩我耶此亦以重其權也

歲終則令百官府各正其治受其會聽其致事而詔王

廢置三歲則大計羣吏之治而誅賞之

歲終十有二月百官府非特治官之屬凡百官有司皆在焉治者有司之職會者宰夫司會之事聽者大宰之法廢置者王所柄執之權按廢置二義一為官職一為政事蓋布治所以端始正治所以成終此月令天子與公卿共飭國典之時也一歲之終將會計之先先戒令之使凡百官府各自正處其治狀各從有司者會之會之而致其功狀則聽而平斷之以告

於王而行廢置之法明始終之條理體統之崇卑周  
官之制自縣象至正治受會皆先事而教有忠厚之  
意無不戒視成之暴周官凡所施行皆如此 又按  
三歲則積歲終之會者三聽者三廢置者三而大計  
之三有功而不怠三有過而不改則誅者誅賞者賞  
此不言詔王者歲終詔王則三歲之大計可知按虞  
書三載考績三考黜陟幽明至成周時其事寢繁而  
其法亦詳矣 或問周官歲終受會三載誅賞較以

唐虞三載考績三考黜陟得無責效之太速與曰考課之法急之則詐偽生寬之則功實見待之以久則在職者安心展布以見其能此唐虞三考之法固善也而亦由當時朝無倖位百僚師師故可須之以久所謂考績不過時加警策以作其怠爾至若三考黜陟則流放止於四罪而臯陶稷契皆終其官不徙其在所陟者亦惟爵服之加而已此唐虞廣大氣象與王者固不同世降而王才不逮古夏商官倍至周而

才益難若不皆得其人必待九載而黜陟則貽害多矣此成周歲終受會三歲計治所以為百代不刊之典然周公之制不徒受會而必詔廢置不徒計治而必行誅賞豈若後世具文故事受成於歲終考滿於一載姦人得矯飾以肆其欺善人不得積久以精其職徒見夫指瓜以待熟循級以俟遷要以如格而已